

իմ զԱլթուն, որ թարգմանի Ոսկի, և զամենայն արեան մերձաւորսն իմ, և զուսուցիչն իմ զՏէր Յակոբ քահանայն, և զՏէր Յակոբ կրօնաւորն՝ որ շնորհեաց զսա... [Աստուածաշունչ ի կայսեր. գրատուն վիենայ]:

1609.

Գրեցաւ զիրս ձեռամբ Թորոս դպրի որդւոյ Միթքոյին. Թվին ՌԾԸ. Ո՛վ եղբայրք, յիշեցէք զմեղաւոր գրչակս: [Ժառագիրք, ի Ս. Ղազար]:

1610.

Ես անարժան Յակոբ երէց Եազլովացի, Թվին ՌԾԸ, սեպտ. 4, փոխարկեցի զԽոստովանութիւնս ի քաղաքն Կամենից. նորընծայ էի, և ի մէջ քառասնից որ գրեցի զսա. ինձ մեղաւորիս՝ Աստուած ողորմի ասացէք վասն Աստուծոյ սիրուն:

1610.

Գրեցաւ Պատարագատետրս ի լաւ և ընտիր օրինակէ՝ ձեռամբ անարժան և անարհեստ Աստուածատուր դպրի, որ եմ որդի Տէր Յակոբին, ի քաղաքն Կամենից, ընդ հովանեաւ Ս. Աստուածածնին և Ս. Նիկողայոսին. ի վայելումն նորընծայ Տէր Ղազարին, և յիշատակ Եազլովիցու Հանկատար Ս. Աստուածածնին. Ով սրբաւնեալ քահանայք, յորժամ որ կարդայք կամ օրինակէք, յիշեցէք զիս և զիմն ամենայն՝ ի դէմ սոսկալի սուրբ պատարագին: Աւարտեցաւ Թվ. ՌԾԸ. սեպտեմ. 28: [Պատարագամեկն. Յով. Արձիւնցոյ. ի Ս. Ղազար]:

1613.

Անուանի զիրքս Ճաշոց, զի հանապազօր ի ճաշոյն ընթեռնի, այլ և կոչի Տարեգիրք, զի զբոլոր տարին ընթերցուածսն յինքն ունի... Յիշեալիք... զզաւակսն իմ և զամենայն արեան մերձաւորսն իմ. նա և զստացող գրոցս զԻւովցի Պր. Պէռնատն՝ Պր. Թորոսի որդին. որ ստացաւ զսա ի հալալ արդեանց և յարդար վաստակոց իւրոց, և ետ յիշատակ անջինջ Զամոսցա քաղաքիս Ս. Աստուածածնի եկեղեցւոյս, վասն հոգոյ իւրոյ և վասն ծնողաց իւրոց. և ինքն ի յայսմ ամի վախճանեցաւ ի Քրիստոս մանուկ տիօք երիտասարդական հասակին, և մեծ կսկիծ հասոյց ծնողացն... Աղաչեմ զձեզ, ով ընթերցող եղբարք իմ, որ մեղադիր չլինիք խոշորութեան և սխալանաց և անյարմարութեան գրոյս. զի պէտպէս վշտօք և շարչարանօք գրեցի. զի ի ՌԾԲ թվին սկսայ և ԿԲին բռին ի յաւարտն հասայ. վասն որոյ խնդրելով աղաչեմ զձեզ որ խնայելով բռնէք զգիրս, և զմեզ անպարտաւ թողուք. մանաւանդ թէ յիշելոյ առնել արժանի... [Կայսեր. գրատուն վիենայ]: